

四庫全書

經部

欽定四庫全書

經部

周禮纂訓卷五

六

詳校官監察御史<sub>臣</sub>施朝幹

刑部郎中<sub>臣</sub>許兆椿覆勘

總校官編修臣王燕緒

校對官待詔臣胡士震

謄錄監生臣雷青松

欽定四庫全書

周禮纂訓卷五

安溪李鍾倫撰

地官司徒第二

惟王建國辨方正位體國經野設官分職以為民極乃  
立地官司徒使帥其屬而掌邦教以佐王安擾邦國  
教官之屬大司徒鄉一人小司徒中大夫二人鄉師下  
大夫四人上士八人中士十有六人旅下士三十有二

人府六人史十有二人胥十有二人徒百有二十人

鄉老二鄉則公一人鄉大夫每鄉卿一人州長每州中

大夫一人黨正每黨下大夫一人族師每族上士一人

閭胥每閭中上一人比長五家下士一人

比毗  
志反

封人中士四人下士八人府二人史四人胥六人徒六  
十人

鼓人中士六人府二人史二人徒二十人

舞師下士二人胥四人舞徒四十人

牧人下士六人府一人史二人徒六十人

牛人中士二人下士四人府二人史四人胥二十人徒二百人

充人下士二人史二人胥四人徒四十人

載師上士二人中士四人府二人史四人胥六人徒六十人

閭師中士二人史二人徒二十人

縣師上士二人中士四人府二人史四人胥八人徒八

十人

遺人中士二人下士四人府二人史四人胥四人徒四  
十人

均人中士二人下士四人府二人史四人胥四人徒四  
十人

師氏中大夫一人上士二人府二人史二人胥十有二  
人徒百有二十人

保氏下大夫一人中士二人府二人史二人胥六人徒

六十人

司諫中士二人史二人徒二十人

司救中士二人史二人徒二十人

調人下士二人史二人徒十人

媒氏下士二人史二人徒十人

司市下大夫二人上士四人中士八人下士十有六人

府四人史八人胥十有二人徒百有二十人

質人中士二人下士四人府二人史四人胥二人徒二

十人

廩人中士二人下士四人府二人史四人胥二人徒二十人

胥師二十肆則一人皆二史賈師二十肆則一人皆二

史司隸十肆則一人司稽五肆則一人胥二肆則一人

肆長每肆則一人

賈音古

泉府上士四人中士八人下士十有六人府四人史八人賈八人徒八十人



司門下大夫二人上士四人中士八人下士十有六人  
府二人史四人胥四人徒四十人每門下士二人府一  
人史二人徒四人

司關上士二人中士四人府二人史四人胥八人徒八  
十人每關下士二人府一人史二人徒四人

掌節上士二人中士四人府二人史四人胥二人徒二  
十人

遂人中大夫二人遂師下大夫四人上士八人中士十

有六人旅下士三十有二人府四人史十有二人胥十有二人徒百有二十人

遂大夫每遂中大夫一人縣正每縣下大夫一人鄙師

每鄙上士一人鄼長每鄼中士一人里宰每里下士一

人鄰長五家則一人

鄼作管反

旅師中士四人下士八人府二人史四人胥八人徒八十人

稍人下士四人史二人徒十有二人

委人中士二人下士四人府二人史四人徒四十人  
土均上士二人中士四人下士八人府二人史四人胥  
四人徒四十人

草人下士四人史二人徒十有二人

稻人上士二人中士四人下士八人府二人史四人胥  
十人徒百人

土訓中士二人下士四人史二人徒八人

誦訓中士二人下士四人史二人徒八人

山虞每大山中士四人下士八人府二人史四人胥八人徒八十人中山下士六人史二人胥六人徒六十人小山下士二人史一人徒二十人

林衡每大林麓下士十有二人史四人胥十有二人徒百有二十人中林麓如中山之虞小林麓如小山之虞川衡每大川下士十有二人史四人胥十有二人徒百有二十人中川下士六人史二人胥六人徒六十人小川下士二人史一人徒二十人

澤虞每大澤大藪中士四人下士八人府二人史四人  
胥八人徒八十人中澤中藪如中川之衡小澤小藪如  
小川之衡

迹人中士四人下士八人史二人徒四十人

卅人中士二人下士四人府二人史二人胥四人徒四

十人

卅音礦號猛反劉侯猛  
反廣韻音潒呼營切

角人下士二人府一人徒八人

羽人下士二人府一人徒八人

掌葛下士二人府一人史一人胥二人徒二十人

掌染草下士二人府一人史二人徒八人

掌炭下士二人史二人徒二十人

掌荼下士二人府一人史一人徒二十人

荼音徒徐音餘廣韻音徒

同都切

掌蜃下士二人府一人史一人徒八人

蜃上忍反

圉人中士四人下士八人府二人胥八人徒八十人

場人每場下士二人府一人史一人徒二十人

廩人下大夫二人上士四人中士八人下士十有六人  
府八人史十有六人胥三十人徒三百人

舍人上士二人中士四人府二人史四人胥四人徒四  
十人

倉人中士四人下士八人府二人史四人胥四人徒四  
十人

司祿中士四人下士八人府二人史四人徒四十人  
司稼下士八人史四人徒四十人

春人奄二人女春枕二人奚五人

奄於檢反劉於驗反枕音由又音榆或羊笑反

饒人奄二人女饒八人奚四十人

饒音熾昌志切

橐人奄八人女橐每奄二人奚五人

大司徒之職掌建邦之土地之圖與其人民之數以佐王安擾邦國以天下土地之圖周知九州之地域廣輪之數辨其山林川澤丘陵墳衍原隰之名物

注九州揚荊豫青兗雍幽冀并也積石曰山竹木曰林注瀆曰川水鍾曰澤土高曰丘大阜曰陵水崖曰



墳下平曰衍高平曰原下濕曰隰名物者十等之名  
與所生之物

疏馬融云東西為廣南北為輪訓此節承上土地  
之圖下土會土宜土均皆辨土地名物之事也

而辨其邦國都鄙之數制其畿疆而溝封之設其社稷  
之蠡而樹之田主各以其野之所宜木遂以名其社與  
其野

注社稷后土及田正之神壇壇與媚埒也田主田神

后土田正之所依也

疏辨邦國之數者謂分別畿外諸侯邦國多少之數辨都鄙之數者謂分別畿內三等采地之數制其畿疆者王畿千里中置王城而有五百里其邦國都鄙亦皆有畿界也溝封之者謂於疆界之上設溝溝為封樹以為阻固也設其社稷之壇者謂於中門之外右邊設大社大稷王社王稷又於廟門之屏設勝國之社稷其社稷外皆有壇埒於四

而也樹之田主者謂籍田之內依樹木而為田主  
各以其野之所宜木云各者總據邦國都鄙并王  
者而言也遂以名其社與其野者假令以松為社  
則名松社之野餘皆放此又云社者五土之總神  
以句龍為后土官有功於土死配社而食稷是原  
隰之神原隰宜五穀稷者五穀之長立稷以表神  
名棄為稷官有功於民死乃配稷而食名為田正  
也注云田主田神者謂郊特牲云先嗇神農是也

田正則司禱是也直以神農為主祭尊可以及卑  
故使后土田正二神憑依之同壇共位耳訓土圭  
以下皆所以辨邦國都鄙而制其畿疆者也

以土會之灋辨五地之物生一曰山林其動物宜毛物  
其植物宜皐物其民毛而方二曰川澤其動物宜鱗物  
其植物宜膏物其民黑而津三曰丘陵其動物宜羽物  
其植物宜覈物其民專而長四曰墳衍其動物宜介物  
其植物宜莢物其民暫而瘠五曰原隰其動物宜羸物

其植物宜叢物其民豐肉而庠

會古外反阜音早本或作早覈音核專徒九反

莢音頰古協反暫音錫白

色也羸力果反庠音婢

注會計也以土計貢稅之法因別此五者也毛物貂

狐貉貉之屬縠毛者也皐物柞栗之屬膏物當為橐

字之誤蓮茨之實有橐韜津潤也覈物李梅之屬專

園也莢物薺茨王棘之屬羸物虎豹之屬淺毛者叢

物萑葦之屬庠猶短也

疏五地之內以民之資生取於動植之物故先言

動植後言民也訓家君子曰山林積草故其物毛  
川澤積水故其物鱗丘陵多樹故其物羽墳衍多  
石故其物介原隰積土故其物羸毛肖草之莖鱗  
肖水之文羽肖木之葉介肖石之體羸肖土之形  
各感其氣而成其類蓋毛物生於山林者金生於  
土也鱗物生於川澤者木生於水也羽物生於丘  
陵者火生於木也介物生於墳衍者水生於金也  
羸物生於原隰者原隰備燥濕高下土寄旺於四

行也阜物覈物剛之屬也膏物英物柔之屬也叢  
物和氣之屬也亦各感其氣而生也毛而方者得  
金土之氣黑而津者得水木之氣專而長者得木  
火之氣皙而瘠者得金水之氣豐肉而庠者得土  
之氣也蓋五地應乎五行而民物之生不離五行  
之化形體既異性情亦殊先王因物以施教蓋由  
乎此矣 下文十有一教是教之事土宜之法是  
養之事先言教後言養者承上文五地之物生而

遂及施教之條所謂修其教不易其俗齊其政不易其宜者也然則隨俗施教既得以類相從而下文任土作貢亦得以類相從矣

因此五物者民之常而施十有二教焉一曰以祀禮教敬則民不苟二曰以陽禮教讓則民不爭三曰以陰禮教親則民不怨四曰以樂禮教和則民不乖五曰以儀辨等則民不越六曰以俗教安則民不愉七曰以刑教中則民不讎八曰以誓教恤則民不怠九曰以度教節



則民知足十曰以世事教能則民不失職十有一曰以

賢制爵則民慎德十有二曰以庸制祿則民興功

愉音  
偷蹏

薄報

反

注陽禮謂鄉射飲酒之禮陰禮謂男女之禮昏禮以  
時則男不曠女不怨儀謂君南面臣北面父坐子伏  
之屬俗謂土地所生習也偷謂朝不謀夕恤謂災危  
相憂民有凶患憂之則民不解怠度謂宮室車服之  
制世事謂士農工商之事少而習焉其心安焉因教

以能不易其業慎德謂矜其善德勸為善也庸功也  
爵以顯賢祿以賞功

疏十曰以世事教能則民不失職者父祖所為之  
業子孫述而行之不失本職訓以刑教中凡教皆  
中道而民或不從刑者所以防其過不及而納之  
於中道故曰刑以防之教中之說也十有二教所  
以範天下之智愚賢否而齊五方之民敬讓和親  
教之所以起此人治之大者故必以此為先焉知

敬讓而後等可辨知和親而後俗可安以刑教中  
所以糾其不敬讓和親之失也以誓教恤所以固  
其敬讓和親之情也以度教節則貧富不得相耀  
而等威益以不越矣以世事教能則四民各世其  
業而習俗益以不偷矣至于以爵勸德以祿勸功  
則民皆興起于賢能此教之終也以度教節如食  
之以時用之以禮誓教恤者約結其民使相救恤  
也 臨川吳氏曰唐虞司徒所敷者五教而周司

徒施十有二教蓋五教舉其綱十有二教則詳其目自一至六是德禮之屬也自七至十二是刑政之屬也爵祿亦刑政之事

以土宜之灋辨十有二土之名物以相民宅而知其利害以阜人民以蕃鳥獸以毓草木以任土事辨十有二壤之物而知其種以教稼穡樹藝

相上聲  
毓音育

注十二土分野十二邦任謂就地所生因民所能

疏知其利害者十二土之中利處居之害處遠之

以阜盛人民以蕃息鳥獸以毓生草木者皆由知利害使之然也十二壤即十二土上經既欲居民不必皆須樹藝故曰土取萬物自生為名此經據樹藝而言故變云壤訓家君子曰五地者經也十二土者緯也十二土各有五地焉故以土宜之灋辨之任土事者即稼穡樹藝之事也以其事重必察其物而知其種故又特言之

以土均之灋辨五物九等制天下之地征以作民職以

令地貢以斂財賦以均齊天下之政

注五物五地所生之物也九等駢剛赤緹之屬

流言天下則并畿外邦國所稅入天子而言也此

地征與下為目也訓郎氏曰九等上中下各三等

也民職即九職地貢即九貢財賦即九賦家君

子曰均平也土地有肥磽之異而貢賦有多寡之

殊所以均之也此節承上土宜之法為任土以

作貢也

駢雖榮反  
緹音紙

以土圭之灋測土深正曰景以求地中日南則景短多  
暑日北則景長多寒日東則景夕多風日西則景朝多  
陰

注土圭所以致四時日月之景也測猶度也不知廣  
深故曰測測土深謂南北東西之深也日南謂立表  
處太南近日也日北謂立表處太北遠日也景夕謂  
日跌景乃中立表之處太東近日也景朝謂日未中  
而景中立表處太西遠日也晝漏半而置土圭表陰

陽審其南北景短於土圭謂之日南是地於日為近  
南也景長於土圭謂之日北是地於日為近北也東  
於土圭謂之日東是地於日為近東也西於土圭謂  
之日西是地於日為近西也凡日景於地千里而差  
一寸

疏鄭云不知廣深故曰測者廣深喻遠近云日南  
謂立表處太南近日云云者日於地中而在南故  
以南表為近日北表為遠日日出東方而西流故



以東表為近日西表為遠日云表陰陽者東方西方是陰陽故別云審其南北也云日景於地千里而差一寸者三光考靈耀云四遊升降於三萬里中下云日至之景尺有五寸謂之地中則是半三萬里而萬五千里與土圭等周公度日景之時置五表五表者於潁川陽城置一表為中表中表南千里又置一表北千里又置一表東千里又置一表西千里又置一表日南景短多暑者據中表之

南而言晝漏半立八尺之表表北得尺四寸景不滿尺五寸曰北者據中表之北而言亦晝漏半表北得景尺六寸曰東據中表之東晝漏半中表景得正時東表日已跌是晝漏半已得夕景日西為中表之西晝漏半中表景得正時西表日未中仍得朝時之景此經皆未得所求耳

日至之景尺有五寸謂之地中天地之所合也四時之所交也風雨之所會也陰陽之所和也然則百物阜安

乃建王國焉制其畿方千里而封樹之

注景尺有五寸者南戴日下萬五千里地與星辰四  
遊升降於三萬里之中是以半之得地之中也畿方  
千里取象於日一寸為正司農云土圭之長尺有五  
寸以夏至之日立八尺之表其景適與土圭等謂之  
地中今潁川陽城地為然

疏然則百物阜安者總結上句所合已下然猶如  
是訓家君子曰此所謂地中及東西南北之偏就

九州以內言之耳如今南方多暑北方多寒近海處多風近山處多陰故惟中州氣候為得其正而其日景則夏至之日與土圭齊故取以為準是日景以土中而定非土中因日景而得也經云正日景以求地中者求之為言猶標識之義耳景短多暑謂景短時多暑也景長多寒言景長時多寒也景夕多風言景夕時多風也景朝多陰言景朝時多陰也景短謂夏景長謂冬景夕謂午後景朝謂

午前自古天地理日月晷景之說多矣至于今日西歷之家其說彌詳蓋以為地在中止一彈丸四方上下去天之數皆均其四表極處非能與天相際也所謂天圓地方者言其動靜之性耳實則地亦圓體如卵裹黃上下周圍與天度相應其地氣寒暑則以去日遠近為差赤道之下正與日對其地最熱其景則四時常均無冬夏短永兩極之下取日最遠其地最寒其景則短者極短長者極長

者極長正當兩極之處常以半年為晝半年為夜  
惟二極與赤道相去之間當日南北軌之外起二  
十三度至四十度許其地不寒不熱溫和可居其  
景則與冬夏進退長短之極皆無過十之七此氣  
之平而數之中也環地上下皆有國土人居各以  
戴天為上履地為下南北東西隨處改觀午夜晨  
昏每每相反蓋皆負氣而生麗陽而明周游環匝  
初無定位其名有亞細亞歐羅巴利末亞亞墨利

加四大洲今之九州及四夷之地皆亞細亞國土也其所記親歷各洲風土山川寥廓荒忽雖不可盡信然其實測道里晷景見諸施行者頗為信而有徵其理蓋不可誣今以其說考之則中國九州正當黃道北軌距赤道二十四度之外起於廣州夏至戴日之下迤邐而北至於夏至去日十六度許則今直隸也自此復出塞而北風氣漸寒晝夜短永漸踰其度自廣州越海而南則氣漸酷熱而

晝夜之刻漸無短永矣故惟九州之內風氣和時  
刻平而洛又其中之中也是以天地四時之所交  
合陰陽風雨之所會和昔之達者其知之矣而周  
公豈欺我哉或曰此以言南北寒暑則可矣東西  
風陰之理亦可得聞與曰由前之說則環處于地  
者迭為東西未可以先儒日出日入午前午後之  
說拘之也蓋九州之域西則多山而東際海近山  
則多陰濱海則多風驗之閩蜀之地可見然則周



禮之風陰亦就九州言之明洛邑之為中耳其所  
以風所以陰恐山水之為而非日出入朝暮之故

家茂夫叔父申言之曰夏至日道下直衡岳晷  
無景北距嵩高弦往九度餘陽城衡岳地平鳥道  
相去約二千五百里去止二千五百里一則尺五  
寸一無景是百六十餘里景已差一寸矣况晷景  
之移視日斜豎以為遲速非可以平率定乎則鄭  
注所云千里而差一寸恐未然也又云景夕者東

表日跌中表景乃中景朝者西表日未中而中表  
景已中如此則極東之地日出方及三五尋丈日  
景已中極西之地日昃將及三五尋丈日景方中  
夫地在天中不過成形之大耳彈丸浮寄四際距  
天之遠若一雖日之出也極東先見及其入也極  
東先昏然南北有常東西無定各隨其處自為曉  
午昏暮安知日東者不以吾為景朝乎日西者不  
以吾為景夕乎且此尺有五寸東西直此一帶中

日景皆然又何以定其為東西之中乎愚謂日南  
謂從此中表而南日北謂從此中表而北東西皆  
然景短即夏至非短於尺有五寸也景長即冬至  
非長於尺有五寸也東地濱海則多風而風起於  
夕故以景夕言之西地多山則雲氣盛故多陰而  
陰霾於朝則以景朝言之惟洛邑天地之所合也  
四時之所交也則無多寒多暑之患風雨之所會  
也則無多風陰陽之所和也則無多陰何以定之

以驗寒暑陰風於五土而惟此為不偏也然特就  
中國九州而奠其四方之中耳若論大地之中當  
在南戴赤道下之國則未知其何如也日至之景  
尺有五寸謂之地中者非謂日景尺有五寸乃為  
地中也是言地中之處其景尺有五寸也 夏至  
日道北距嵩高十二度而家茂夫叔父言九度餘  
者十二度以天體之圖言之九度餘以徑直言之  
四分之而得三分有奇也晷景之移視日斜豎以

為遲速者日斜照則晷景移速日直照則晷景移  
遲晷景移速者地相去不甚遠而景長景短之差  
至多也晷景移遲者地相去有至遠而景長景短  
之差不多也皆以日之斜豎有異故也言此者明  
晷景之移既有遲速則不可以千里而差一寸之  
定例律之也 此建王國之事

凡建邦國以土圭土其地而制其域諸公之地封疆方  
五百里其食者半諸侯之地封疆方四百里其食者參

之一諸伯之地封疆方三百里其食者參之一諸子之地封疆方二百里其食者四之一諸男之地封疆方百里其食者四之一

疆居良切下同

注土其地猶言度其地司農云土其地但為正四方耳其食者半公所食租稅得其半耳其半皆附庸小國屬天子參之一亦然玄謂食者半參之一四之一者土均均邦國地貢輕重之等大國貢重正之也小國貢輕字之也凡諸侯為牧正帥長及有德者乃有

附庸為其有祿者當取焉公無附庸侯附庸九同伯  
附庸七同子附庸五同男附庸三同進則取焉退則  
歸焉魯於周法不得有附庸故言錫之也地方七百  
里者包附庸以大言之也附庸二十四言得兼此四  
等矣

疏注言諸侯為牧正帥長及有德者乃有附庸案  
王制云州有伯伯即牧也牧正帥長皆是有功諸  
侯乃得為之有功即有附庸又諸侯有德雖不為

牧正帥長亦得有附庸云謂其有祿者當取焉謂  
取閒田為附庸以為祿也云公無附庸者以其天  
子畿方千里上公五百里地極故無附庸侯附庸  
九同者以侯有功進受公地蓋公方五百里開方  
之方百里者五五二十五侯四百里開方之四四  
十六加九同則為二十五同與公等伯地三百里  
三三而九加七同則為十六同與侯等子有功進  
受伯地加五同與伯等男有功受子地男本一同



加三同與子等云進則取焉謂附庸者退則歸焉  
謂為閒田者也云魯不得有附庸者魯雖侯爵以  
其王子母弟畫服如上公受五百里之地成王以  
周公制典法之勲賜魯以侯伯子男四等附庸故  
云方七百里包附庸以大言之也凡言同者皆百  
里地百里則為國周法不滿百里乃為附庸今皆  
名附庸為同者積集附庸成同并數之矣訓朱子  
曰先儒說封建古者公侯百里伯七十里子男五

十里至周公則斥大疆界始大封侯國公五百里  
侯四百里伯三百里子二百里男百里此則將那  
小底移動添封為大國豈有此理禹塗山之會執  
玉帛者萬國當時所謂國者如今溪洞之類或  
五六十家或百十家各立箇長後來到夏商衰時  
皆相吞并漸漸大了至周時只有千八百國便是  
萬國吞并為千八百國不及五分之一矣可見其  
又大了周畢竟是因而封之豈有移去許多小國

卻封為大國然聖人立法亦自有低昂不如此截  
然如封五百里這一段四面大山如太行卻有六  
百里不成又挑出那百里外加封四百里這一段  
卻有三百五十里不成又去別處討一段五十里  
來添都不如此殺定蓋孟子時去周已七八百年  
如今去隋時既無人記得又無載籍可考所以難  
見得端的又周封齊魯之地是誅紂伐奄滅國者  
五十所以封齊魯之地極廣如魯地方千里如齊

東至海西至河南至穆陵北至無棣是多少廣濶  
朱子所謂欲封五百里適有一段地方六百里  
者餘一百里當即是附庸間田矣或有不滿五百  
里四百里之數當亦有絕長補短之法要之所謂  
自有低昂不截然假定知此者可以言周禮矣

凡造都鄙制其地域而封溝之以其室數制之不易之  
地家百畝一易之地家二百畝再易之地家三百畝

古畝

文畝  
字

注都鄙王子弟公卿大夫采地其界曰都鄙所居也  
王制曰天子之縣內方百里之國九七十里之國二  
十有一五十里之國六十有三此蓋夏時采地之數  
周未聞矣城郭之宅曰室以其室數制之謂制丘甸  
之屬鄭司農云不易之地歲種之地美一易之地休  
一歲乃復種再易之地休二歲乃復種

疏四丘為甸四甸為縣四縣為都家邑二十五里  
小都五十里大都百里是造都鄙制其地域也以其

室數制之者室在都邑之內三等采地皆有城郭依其城內室數於四野之中制地與之訓謝氏曰邦國主分地故度地制域都鄙主治民故地域大小除山川邑居等虛數以居民實數計之又知受田之數知室家之數也

乃分地職奠地守制地貢而頒職事焉以為地灋而待政令

注分地職分其九職所宜也定地守謂衡麓虞候之

屬制地貢謂九職所稅也頒職事者分命使各為其所職之事地職農圃地守虞衡地貢如載師任地法園廛二十而一以下

訓自土圭以下至此皆承辨其邦國都鄙之數而言先王國次畿外諸侯次都鄙采地

以荒政十有二聚萬民一曰散利二曰薄征三曰緩刑四曰弛力五曰舍禁六曰去幾七曰省禮八曰哀殺九曰蕃樂十曰多昏十有一曰索鬼神十有二曰除盜賊

弛式氏反舍音捨殺所界  
反除所例反蕃力袁反

注散利貸種食也薄征輕租稅也弛力息繇役也舍  
禁若公無禁利去幾去其稅青禮殺吉禮殺哀省凶  
禮蕃樂閑藏樂器而不作多昏不備禮而娶昏者多  
也索鬼神求廢祀而修之除盜賊饑饉則盜賊多急  
其刑以除之

疏貸種食者謂豐時斂之凶時散之民無者從公  
貸之或為種子或為食用至秋熟還公據公家為



散據民往取為貸荒政據大凶年為義五穀不升  
謂之大飢一穀不升謂之嗛二穀不升謂之飢三  
穀不升謂之饑四穀不升謂之康五穀不升謂之  
大侵即大飢也案均人云凶札則無力征財賦此  
既據大飢猶云薄征者此經雖主大飢兼記一穀  
二穀不熟之歲故有輕稅也舍禁山澤所遮禁者  
舍去其禁使民取蔬食去飢案司關云國凶札則  
無門關之征猶幾多昏使有女之家得減口數有

男之家易得其妻訓索鬼神固是求廢祀而修之  
然亦有禱祠諸神以求禦災捍患之事焉散利薄  
征以君養民也緩刑弛力使民得自養也五至六  
與民通財也七至十與民省用也索鬼神以祈其  
福除盜賊以去其害

以保息六養萬民一曰慈幼二曰養老三曰振窮四曰  
恤貧五曰寬疾六曰安富

注保息謂安之使蕃息也慈幼如十四以下不從征

養老七十養於鄉五十異糧之屬振窮拊捄天民之窮者也窮者有四曰矜曰寡曰孤曰獨恤貧貧無財業稟貸之寬疾若今癰不可事不算卒可事者半之也安富平其繇役不專取

疏上經既陳凶荒不安之事故此經陳安養萬民之道注云養老七十養於鄉案王制云五十養於鄉彼謂大夫士也王制又云凡三王養老皆引年註云已而引戶校年當行復除也老人衆多非賢

者不可皆養故食貨志云七十已上所養也此云

七十養於鄉亦謂有賢行者也

拼音拯本亦作拯  
拯音救卒子忽反

以本俗六安萬民一曰媾宮室二曰族墳墓三曰聯兄

第四曰聯師儒五曰聯朋友六曰同衣服

媾音美聯兄弟  
一本作聚兄弟

注本猶舊也媾善也謂約椽攻堅風雨攸除各有攸

宇族猶類也同宗者生相近死相迫聯猶合也兄弟

昏姻嫁娶也師儒鄉里教以道藝者同師曰朋同志

曰友同猶齊也民雖有富者衣服不得獨異

疏經云美宮室明不使華美故以攻堅解之云兄弟是昏姻嫁娶者案爾雅釋親云父之黨為宗族母與妻黨為兄弟又案喪服記兄弟皆有外邦及與兄弟居彼皆據同宗小功以下知此兄弟是昏姻非同宗者上云族墳墓是同宗明此兄弟施於外姓昏姻爾雅又云婦之黨為昏兄弟夫婦相名亦為兄弟故曾子問曰不得嗣為兄弟是以知兄弟是昏姻也云師儒鄉里教以道藝者以其鄉立

庠州黨及遂皆立序致仕賢者使教鄉閭子弟鄉  
閭子弟皆相聯合同就師儒保息者養其人也本  
俗者安其俗也此二者養民之經荒政者救民之  
權

正月之吉始和布教于邦國都鄙乃縣教象之灋于象  
魏使萬民觀教象挾日而斂之乃施教灋于邦國都鄙  
使之各以教其所治民

縣音玄挾  
于協反

疏據邦國則使諸侯教所治民據都鄙則使公卿

大夫教所治民訓教法十二教以下皆是十二教其綱也以下詳其目也

令五家為比使之相保五比為閭使之相受四閭為族使之相葬五族為黨使之相救五黨為州使之相賙五

州為鄉使之相賔

比毗志反下同賙音周

注使之者皆謂立其長而教令使之保猶任也受者宅舍有故相受寄托也

疏五家相保不為過惡訓郎氏曰五家為比使之

相保羣相親近則易相督察也 注謂相受為受  
寄托者如托其妻子於其友之類蓋一鄉之中其  
情意有親疏之殊焉其服容音聲有生熟之別焉  
此所以因地而教不同至於鄉人之聚則其論公  
矣故使之相與賓賢能而進之也

頒職事十有二于邦國都鄙使以登萬民一曰稼穡二  
曰樹藝三曰作材四曰阜蕃五曰飭材六曰通財七曰  
化材八曰斂材九曰生材十曰學藝十有一曰世事十



有二曰服事

飭音勅

注司農云生材即間民無常職轉移執事學藝謂學道藝世事謂以世事教能則民不失職立謂生材謂養竹木者

疏大司徒主天下人民之數故頒下民之職事十有二條于天下使以登成萬民不言鄉遂及公邑者舉外以包內一曰稼穡以下八曰斂材以上即太宰九職中八者也此又重掌者以太宰尊官總

知其事此司徒是主民之官親自頒行服事謂若  
府史胥徒庶人在官者是公家服事者也注云生  
材謂間民無常職轉移執事此頒職事不可頒無  
常職使民行之故後鄭易之以為養竹木解之

以鄉三物教萬民而賓興之一曰六德知仁聖義忠和

二曰六行孝友睦婣任恤三曰六藝禮樂射御書數

知音

智行下孟  
反婣音因

注物猶事也興猶舉也民三事教成鄉大夫舉其賢

者能者以飲酒之禮賓客之既而獻其書於王矣睦  
親於九族媯親於外親任信於友道恤振憂貧者

疏注云睦親於九族者堯典云九族既睦是睦親  
於九族也九族者上自高祖下至玄孫旁及總麻  
之內此媯對睦施於外親不對睦亦施於內親五  
射白矢參連剡注襄尺井儀五御鳴和鸞逐水曲  
過軍表舞交衢逐禽左六書象形會意指事轉注  
假借諧聲九數方田粟布差分少廣商功均輸方

程羸不足旁要

以鄉八刑糾萬民一曰不孝之刑二曰不睦之刑三曰  
不嫺之刑四曰不弟之刑五曰不任之刑六曰不恤之  
刑七曰造言之刑八曰亂民之刑弟音悌

注不弟不敬師長造言訛言惑衆亂民亂名改作執  
左道以亂政

疏上言友專施於兄弟此變言弟無施於師長故  
退在睦嫺之下訓吳氏曰造言亂民害其六行之

教也六行與此二者相為消長以二者之刑而列於八刑之後則六行之教修矣 德與藝皆學士大夫之事惟士為能故不可設刑而六行有刑也以五禮防萬民之偽而教之中以六樂防萬民之情而教之和

注禮所以節止民之侈偽使其行得中樂所以蕩正民之情思使其心應和

疏案樂記云禮者著誠去偽故以禮防萬民之偽

而教之使得中正也不覆申射御書數而獨申禮  
樂二事但化民以禮樂為急

凡萬民之不服教而有獄訟者與有地治者聽而斷之

其附于刑者歸于士

治直吏反  
斷丁亂反

注爭罪曰獄爭財曰訟有地治者謂鄉州及治都鄙  
者也士司寇士師之屬司農云與有地治者聽而斷  
之與其地部界所屬吏共聽斷之

疏附于五刑則歸於士若有小罪則司徒決之訓

不服教不服於禮樂之教也

祀五帝奉牛牲羞其肆

肆託歷反  
司農音四

注牛能任載地類也肆進所肆解骨體士喪禮曰肆  
解去蹄

訓奉牛牲謂初牽入時羞其肆豚解也案國語禘  
郊之事則有全烝若然則禘郊之事先全烝始後  
豚解若宗廟之祭則無全烝先豚解次體解也

享先王亦如之

疏享先王不辨祭之大小彼大宗伯四時及禘祫  
六者皆稱享亦如之者亦如上祀五帝奉牛牲羞  
其肆不言祭地者祭地之禮與天同

大賓客令野修道委積大喪帥六鄉之衆庶屬其六引  
而治其政令大軍旅大田役以旗致萬民而治其徒庶  
之政令若國有大故則致萬民於王門令無節者不行  
於天下大荒大札則令邦國移民通財舍禁弛力薄征

緩刑

札側  
八反



注少曰委多曰積皆所以給賓客令遣人使為之也  
衆庶所致役也司農云六引謂引喪車索也六鄉主  
六引六遂主六紼旗畫熊虎者徵衆刻日樹旗期於  
其下大故謂王崩及寇兵也大荒大凶年大札大疫  
病移民辟災就賤其有守不可移者則輸之穀

疏大賓客據諸侯來朝大喪謂王喪致萬民於王  
門者以待任用也移民通財此謂兩事移民謂分  
口往就賤財是米穀也其有留守不得去者賤處

通穀米與之

歲終則令教官正治而致事

注歲終周季冬也教官其屬六十正治明處其文書  
致事上其計簿

正歲令于教官曰各共爾職修乃事以聽王命其有不  
正則國有常刑

疏不正謂文書不正直而有濫失訓或曰司徒以  
教名官而兼言養何也曰此其所以為教也故於

篇端即以十二教言之而其後法制品節之詳莫能外焉是故十二教首言禮樂之事則所謂以五禮防民僞而教之中以六樂防民情而教之和者也以儀辨等則封國立家之制也以俗教安則本俗安民之事也以刑教中則八刑糾民之條也以誓教恤則荒政保息及相保相受之屬也

荒政保息者君

恤民也相保相受者民相恤也

以度教節以世事教能則職事之

頒也

民有職事則因勤苦而愛惜物力矣故曰以度教節

以賢制爵以庸制

祿則賓興作人之盛也十二教舉其綱以下詳其  
目舉其綱者以禮樂始詳其目者以禮樂終始乎  
禮樂者以教化之本末言之則先本而後末終乎  
禮樂者以功效之淺深言之則由淺而入深禮樂  
據其兩端而政以行之刑以防之莫不經緯條理  
於其中焉要之莫非教也曰既有十二教矣又有  
三物何也曰一也得此教之大原而心知其意者  
謂之德務此教之實行而身履其事者謂之行習

此教之文章而通其器數者謂之藝此其所以為  
一也且夫十有二教王者所以覺悟黎蒸三物者  
天子所以登進髦士其用則不同矣曰三物之有  
行與藝也固所以成教化育人材若夫智仁聖義  
忠和則安得而教之而安得而取之曰三代之世  
所以陶淑斯人之事詳矣於是有氣質清明者出  
於其間故設是科以待之耳固非如行與藝之得  
以即事而考者也曰經言教養之事參差不齊若

前後重複者何也曰王道之始終具矣是故首於  
用天因地之宜中於建國立家之事終於宜民善  
俗之功用天因地則民有資生之利而善心復矣  
建國立家則君知理民之責而政有經矣宜民善  
俗則天下皆得其所人有士人君子之行而教化  
洽矣何為其重複哉若乃其間之或養或教參伍  
錯綜則因立言之次第設施之先後以求之莫不  
有序存焉故曰司徒一篇教養並行而教即寓於

養者也

小司徒之職掌建邦之教灋以稽國中及四郊都鄙之夫家九比之數以辨其貴賤老幼廢疾凡征役之施舍與其祭祀飲食喪紀之禁令

注夫家猶言男女也九比者冢宰職出九賦者之人數也施當為弛

疏併言都鄙者司徒是主土地之官故亦兼主采地之法辨其貴賤老幼廢疾謂別其貴賤老幼廢

疾合科役者科役之施舍者貴與老幼廢疾不科役故言弛也祭祀者謂鄉中州祭社黨祭禴族祭酺飲食者謂若行鄉飲酒及族食喪紀者謂若四閭為族使之相葬之等禁令者祭祀以下皆有禁令不使失禮法訓家茂夫叔父云賤謂服公事者稽其夫家者總言之也辨其貴賤老幼廢疾者別言之也疏於祭祀飲食喪紀獨舉州祭社及鄉飲酒之屬言之者尋常民間之祭祀飲食喪紀禮



法簡不須小司徒掌其禁令如疏所言三事其禮法多故掌其禁令也

乃頒比灋于六鄉之大夫使各登其鄉之衆寡六畜車輦辨其物以歲時入其數以施政教行徵令

畜許六反後六畜皆同

疏比法謂若下經五人為伍五伍為兩是也衆寡據人民六畜馬牛羊豕犬鷄車謂革車及大車輦人挽行以歲之四時具錄其數入小司徒以施政教者小司徒所施政教依其數而施行之以行徵

令者以徵索於民及所施政令亦據民物等數而行之訓家茂夫叔父云施政教者祭祀三者是也行徵令者征役與其施舍是也然頒六鄉則六遂至邦國皆頒之矣故縣師職云掌邦國都鄙稍甸郊里而辨其夫家人民田萊之數及其六畜車輦之稽辨其物謂辨其可征役者與其施舍者也及三年則大比大比則受邦國之比要

注大比謂使天下更簡閱民數及其財物也受邦國

之比要亦受鄉遂矣要謂其簿

疏上經頒比法每歲之四時簡閱衆寡及其物等  
此經三年大比則并天下邦國而言訓比要亦謂  
衆寡六畜車輦之計簿也鄉遂之計簿則歲時入  
之邦國之計簿則三年大比時受之上文言小司  
徒主稽人民之數自乃頒比法至此二條言六鄉  
邦國之吏以時各登其數而人之此所謂比也下  
文五人為伍以五相乘即所謂比法也小司徒之

所以稽其數者以欲施政役行禁令不得其數則政役必不均禁令必不過而壅蔽之患起然而其數至繁故欲稽之者必以五五紀之而後居為族黨出為軍師人戶無隱匿之弊財產有一定之籍貧富貴賤不相為病於是案之以施政役則政役得其平按之以行禁令則禁令得其治此小司徒所以稽其數而辨之六鄉邦國之屬所以登其數而入之也

乃會萬民之卒伍而用之五人為伍五伍為兩四兩為卒五卒為旅五旅為師五師為軍以起軍旅以作田役  
以此追胥以令貢職

注此皆先王所因農事而定軍令者也追逐寇也胥伺捕盜賊也鄉之田制與遂同

訓問都鄙四丘為甸甸六十四井出車一乘甲士三人步卒七十二人不審鄉遂車賦則何如曰鄉遂亦有車但不可見其制六鄉一家出一人排門

是兵都鄙七家而出一兵在內者役重而賦輕在外者役輕而賦重六軍只是六鄉之衆六遂不與六遂亦有軍但不可見其數侯國三軍亦只是三郊之衆三遂不與大國三郊次國二郊小國一郊蔡季通說車一乘不止甲士三人步卒七十二人此是輕車用馬馳者更有二十五人將重車在後用牛載糗糧戈甲衣裝見七書如魯頌公徒三萬亦具其說矣 又曰遂所以必為溝洫不為井者

以欲起兵數故也五比五鄰五伍之後變五為四  
閭四里四兩者用四則成百之數復用五則自此  
奇零不齊整矣丘氏曰司馬法曰兵車一乘甲  
士三人步卒七十二人是則一乘七十五人也約  
而言之兵車一乘則三兩之數四乘則三卒之數  
百乘則三師之所合五百乘則三軍之所合積而  
至於千乘則六軍聚焉是則六軍之數適足以容  
千乘乃天子宿衛之兵其餘六遂都鄙之兵悉天

子之畿內則為萬乘矣諸侯大國則有千乘而三鄉三軍則僅止於五百乘耳

乃均土地以稽其人民而周知其數上地家七人可任也者家三人中地家六人可任也者二家五人下地家五人可任也者家二人

注一家男女七人以上則授之以上地所養者衆也男女五人以下則授之以下地所養者寡也正以七人六人五人為率者有夫有婦然後為家自二人以



至於十為九等七五六者為其中可任謂丁強任力  
役之事者出老者一人其餘男女強弱相半其大數  
疏均土地者制上地下地使得均平稽其人民者  
既給土地則據土地計考其人民可任不可任之  
事訓上文五伍之法每家只出一人乃正卒也此  
條悉數人民戶口而總計其可任者乃羨卒也羨  
卒正卒皆可任者也其貴任老幼廢疾而施舍者  
即通寓於七人六人五人之中蓋必先立正卒而

後有以定五伍之制必周知人民然後有以辦可任不可任之事此制一定則政役可均禁令可行矣

凡起徒役毋過家一人以其餘為羨唯田與追胥竭作

毋音無羨  
錢面反

疏六鄉以上劑致民一人正卒其餘為羨六遂以下劑致民一人正卒一人為羨卒其餘為餘夫饒遠故也訓家一人即五人為伍節其餘為羨即

可任節

凡用衆庶則掌其政教與其戒禁聽其辭訟施其賞罰  
誅其犯命者

疏凡用衆庶則上經所云是也犯命謂若大司馬  
羣吏聽誓於陳前司徒北面以誓之小子斬牲以  
左右徇陳訓此條凡用衆庶兼正卒羨卒言也

凡國之大事致民大故致餘子

注大事謂戎事大故謂寇災鄭司農云國有大事當

徵召會聚百姓則小司徒召聚之餘子謂羨也

訓此條分正卒羨卒言也

乃經土地而井牧其田野九夫為井四井為邑四邑為丘四丘為甸四甸為縣四縣為都以任地事而令貢賦凡稅斂之事

注此謂造都鄙也采地制井田異於鄉遂重立國小司徒為經之立其五溝五塗之界井牧者春秋傳所謂井衍沃牧隰皋者也隰皋之地九夫為牧二牧而

當一井今造都鄙授民田有不易有一易有再易通  
率二而當一是之謂井牧昔夏小康在虞思有田一  
成有衆一旅一旅之衆而田一成則井牧之法先古  
然矣九夫為井者方一里九夫所治之田也此制小  
司徒經之匠人為之溝洫相包乃成曰邑丘之屬相  
連比以出田稅溝洫為除水害四井為邑方二里四  
邑為丘方四里四丘為甸甸之言乘也讀如衷甸之  
甸甸方八里旁加一里則方十里為一成積百井九

百夫其中六十四井五百七十六夫出田稅三十六井三百二十四夫治洹四甸為縣方二十里四縣為都方四十里四都方八十里旁加十里乃得方百里為一同也積萬井九萬夫其四千九十六井三萬六千八百六十四夫出田稅二千三百四井二萬七千三百三十六夫治洹三千六百井三萬二千四百夫治澮井田之法備於一同今止於都者采地食者皆四之一其制三等百里之國凡四都一都之田稅入於王

五十里之國凡四縣一縣之田稅入于王二十五里之國凡四甸一甸之田稅入于王地事謂農牧衛虞也貢謂九穀山澤之材也賦謂出車徒給繇役也司馬法曰六尺為步步百為晦晦百為夫夫三為屋屋三為井井十為通通為匹馬三十家士一人徒二人通十為成成百井三百家革車一乘士十人徒二十人十成為終終千井三千家革車十乘士百人徒二百人十終為同同方百里萬井三萬家革車百乘士

千人徒二千人

疏井牧其田野者次田二牧當上地一井授民田之時上地不易家百畝中地一易家二百畝下地再易家三百畝通率三家受六夫之地一家受二夫與牧地同故云井牧其田野鄭知此謂造都鄙者鄉遂公邑之中皆為溝洫之法此經為井田之法故知謂造都鄙也云采地制井田異于鄉遂雖不言異于公邑公邑亦與遂同云九夫為井方一



里九夫所治之田者鄭據地有九夫而言非謂有九家也  
治溝洫者皆不出稅獨言治洫者據外而言其實治溝亦  
不出稅總在六十四井之內以洫言之矣云甸之言乘者  
欲見甸中出長轂一乘云采地食者皆四之一者案上諸  
男之地亦四之一故云采地食者皆四之一也云其制三  
等者謂家邑小都大都云賦謂出車徒給繇役者以采  
地無賦入天子之法故以賦為軍賦解之太宰九賦有  
家稍邦縣邦都之賦者謂三等采地外有公邑賦入王

家但公邑無名故舉三等之號以表之耳司馬法云井十為通通為匹馬者井有九夫十井為九十夫之地宮室塗巷三分去一唯有六十夫地在不易一易再易通率三夫受六夫之地三十夫受六十夫之地唯三十家使出馬一匹也云士一人徒二人者三十家出三人士謂甲士徒謂步卒此謂天子畿內采地法鄭注論語道千乘之國亦引司馬法革車一乘甲士三人步卒七十二人彼是畿

外邦國法也凡出軍之法先六鄉賦不止次出六  
遂賦猶不止徵兵於公邑及三等采賦猶不止乃  
徵兵於諸侯大國三軍次國二軍小國一軍此軍  
等皆出於鄉遂賦猶不止則諸侯有遍境出之法  
則千乘之賦是也訓問古以百步為畝今如何曰  
今以二百四十步為畝百畝當今四十一畝 豐  
鎬去洛邑三百里長安所管六百里王畿千里亦  
有橫長處非若今世之為圖畫方也恐井田之制

亦是類此不可執畫方之圖以定之 丘氏曰甸  
方八里旁加一里則方十里為一成積百井其中  
六十四井為田其三十六井則山川城郭方八十  
里旁加十里則方百里為一同積萬井其中六千  
四百井為田而三千六百井為山川城郭以四數  
之言田之實數司馬法以十數之無山川城池而  
言也 附錄畿內大夫采地二十五里三分去一  
除八里有奇為山川城郭餘十六里為實田正合

此經一縣之里數卿采地五十里三分去一除十  
七里為山川城郭餘三十里為實田正合此經小  
都之里數公采地百里除山川城郭三十餘里餘  
六十四里合大都實田之里數蓋周公造都鄙惟  
計實田不通言封域大小故大司徒造都鄙而曰  
以其室數制之也

乃分地域而辨其守施其職而平其政

政依注  
音征

注分地域謂建邦國造都鄙制鄉遂也

訓附錄此條屬上文皆是造都鄙之事即都鄙夫  
家之比法也分地域即大司徒之制其地域而封  
溝之也辨其守施其職平其政即大司徒之分地  
職奠地守制地貢也大司徒以立家為義故先言  
制地而後及授田小司徒以比法為重故先言田  
野而後及分地也

凡小祭祀奉牛牲羞其肆

肆託  
歷反

注小祭祀王玄冕所祭

疏案司服職云羣小祀則玄冕彼注云小祭祀林澤百物其於天神亦有小祀則風師雨師之等小祭祀既用牛則王之祭祀無不用牛者

小賓客令野修道委積

注小賓客諸侯之使臣

疏大司徒註令令遺人此雖無注亦與彼同

大軍旅帥其衆庶小軍旅巡役治其政令

注帥帥而致於大司徒巡役小力役之事則巡行之

大喪帥邦役治其政教

注喪役正棺引窆復土

疏注解經喪役不據初死以其初死所役無多故  
據葬時而言正棺謂七月而葬朝廟之時正棺于  
廟引謂葬時引柩窆謂下棺於坎天子六紼四碑  
背碑挽引而下棺復土者掘坎之時掘土向外下  
棺之後反覆此土以為丘陵

凡建邦國立其社稷正其畿疆之封



疏邦國謂畿外諸侯邦國立其社稷者諸侯亦有  
三社三稷謂國社侯社勝國之社皆有稷配之言  
立其社稷謂以文書法度與之不可國國身往也  
正其畿疆者謂九畿畿上皆有疆界封樹以為阻  
固

凡民訟以地比正之地訟以圖正之

注鄭司農云以田畔所與比正斷其訟地訟爭疆界  
者圖謂邦國本圖

疏民訟謂六鄉之民有爭訟者是非難辨故以地之比鄰知其是非者共正斷其訟言圖為邦國本圖者凡量地以制邑初封量之時即有地圖在於官府民有訟者即以此圖正之訓建國次在小祭祀以下之後者小祭祀以下皆所以令鄉遂者也故因言之

歲終則考其屬官之治成而誅賞令羣吏正要會而致

事

治直吏反  
下文同

注治成治事之計

正歲則帥其屬而觀教灋之象徇以木鐸曰不用灋者  
國有常刑令羣吏憲禁令脩灋糾職以待邦治

䟽待邦治者待國家有治則供之

及大比六鄉四郊之吏平教治正政事攷夫屋及其衆  
寡六畜兵器以待政令

䟽言及大比者亦是三年大校比戶口訓附錄夫  
屋即夫家也注䟽以夫三為屋屋三為井三三相

保不得隱誤解之然六鄉無九夫之制難以相通  
上文頒比法於六卿使各登其數而歲入之此則  
三年大比受其比要而平之正之攷之也大比六  
卿則甸稍縣都邦國亦大比之矣故縣師職云三  
年大比則以攷羣吏而以詔廢置

周禮纂訓卷五

欽定四庫全書

周禮纂訓卷六

安溪李鍾倫撰

鄉師之職各掌其所治鄉之教而聽其治

疏鄉師四人其鄉有六二人共主三鄉訓鄉師之  
職所掌皆稽器屬徒之令鄉大夫之職所掌皆德  
行道藝之教蓋鄉大夫以卿為之其職貴其事重  
故復有鄉師以貳其部分督率之政焉此其職事

所以相成也

以國比之灋以時稽其夫家衆寡辨其老幼貴賤廢疾馬牛之物辨其可任者與其施舍者掌其戒令糾禁聽其獄訟

注施舍謂應復免不給繇役

疏國比之法案小司徒職云稽九比之數以辨其貴賤老幼廢疾訓戒令糾禁獄訟之事自大役以下皆是

大役則帥民徒而至治其政令既役則受州里之役要

以考司空之辟以逆其役事

辟婢亦反

注而至至作部曲也役要所遣民徒之數辟功作章  
程逆猶鉤考也以役要攷司空之辟者以人之衆寡  
稽所作事之多少也以逆其役事者以所作事之苦  
良別踵董事者之修墮也

凡邦事令作秩叙

注事功力之事秩常也叙猶次也事有常次則不偏

匱

疏凡國家有功作之事皆出政令使多少有常事  
有次叙訓多少有常則財不匱事有次叙則民不  
偏

大祭祀羞牛牲共茅蘗

蘗子都反一  
音子餘反

注蘗士虞禮所謂苴刈茅長五寸束之者是也此所  
以承祭既祭蓋束而去之守祧職云既祭藏其隋是  
與



疏羞牛牲佐大司徒也案甸師掌共蕭茅此鄉師  
得茅束而切之立之祭前以藉祭

大軍旅會同正治其徒役興其輦輦戮其犯命者

輦音  
楫居

切玉

注輦駕馬輦人輓行所以載任器也止以為蕃營司  
馬法曰夏后氏謂輦曰余車殷曰胡奴車周曰輜輦  
輦一斧一斤一鑿一耜一鋤周輦加二版二築又曰  
夏后氏二十人而輦殷十八人而輦周十五人而輦

疏正治其徒役者謂六軍之外別有民徒使役皆出於鄉黨載輜重者知不駕牛者唯駕大車柏車等輿或以為挿或以為鋤一也築杆也

大喪用役則帥其民而至遂治之

疏大喪用役謂若輓六引之等

及葬執纛以與匠師御匱而治役

纛桃報反劉音毒玉篇作翽廣韻音導徒

到切又音毒匱音舊

注匠師事官之屬其於司空若鄉師之於司徒也鄉

師主役匠師主衆匠共主葬引雜記曰匠人執翬以御柩鄭司農云翬羽葆幢也爾雅曰纛翳也以指揮輓柩之役正其行列進退

疏雜記是諸侯禮匠人執翬此天子禮鄉師執翬及窆執斧以泣匠師

注匠師主豐碑之事執斧以泣之使戒其事

疏窆下棺也

凡四時之田前期出田濊于州里簡其鼓鐸旗物兵器

脩其卒伍

注田獵人徒及所當有

疏人徒即經卒伍所當有即經鼓鐸旗物兵器

及期以司徒之大旗致衆庶而陳之以旗物辨鄉邑而治其政令刑禁巡其前後之屯而戮其犯命者斷其爭

禽之訟

斷丁  
亂反

注司徒致衆者熊虎之旗此又以之明為司徒致之大夫致衆當以鳥隼之旗前後屯車徒異部也

疏辨鄉邑者田獵之時非直有六鄉之衆亦有公  
邑之民分別之云大夫致衆當以鳥隼之旗者案  
司常孤卿建旌大夫士建物司徒卿官尋常建旌  
卿師大夫官尋常建物在旌下明在軍則卿建熊  
虎之旗大夫當建鳥隼之旗在旗下矣車徒異部  
者謂大司馬云險野人為主易野車為主是也  
凡四時之徵令有常者以木鐸徇於市朝

注徵令有常者謂田狩及正月命脩封疆二月命雷

且發聲

以歲時巡國及野而賙萬民之難阨以王命施惠

難古  
艱字

本亦  
作艱

疏以歲之困阨之時

歲終則攷六鄉之治以詔廢置

疏詔告王與冢宰

正歲稽其鄉器比共吉凶二服閭共祭器族共喪器黨  
共射器州共賓器鄉共吉凶禮樂之器

注吉服祭服也凶服弔服也比長主集為之祭器簋  
簋鼎俎之屬閭師主集為之喪器夷槃素俎楮豆軋  
軸之屬族師主集為之此三者民所以相共也射器  
者弓矢楅中之屬黨正主集為之為州長或時射於  
此黨也賓器者尊俎笙瑟之屬州長主集為之為鄉  
大夫或時賓賢能於此州也吉器若閭祭器者也凶  
器若族喪器者也禮樂之器若州黨賓射之器者鄉  
大夫備集此四者為州閭族黨有故而不共也此鄉

器者旁使相共則民無廢事上下相補則禮行而教成  
疏云吉服祭服者比無祭事族祭酺黨祭禴州祭  
社無過用朝服又知凶服是弔服者若衰裳主人  
自共庶人之弔服無過素冠深衣而已素俎楮豆軼軸者  
士喪禮小斂有素俎大斂有楮豆既夕禮用軼軸以載柩  
此大夫士禮引之以況義實大夫士有祿位不在共限案  
載師里布屋粟注云罰之以共吉凶二服及喪罷不言祭  
罷者省文此三者皆非官事故不用官物自射罷以下皆為



國行禮得用官物不出民物也

若國大比則攷教察辭稽器展事以詔誅賞

注攷教視賢能以知道藝與否察辭視吏言事知其情實不展猶整具

鄉大夫之職各掌其鄉之政教禁令正月之吉受教灋于司徒退而頒之于其鄉吏使各以教其所治以攷其德行察其道藝

注具鄉吏州長以下

疏教法十二教以下德行六德六行道藝六藝

以歲時登其夫家之衆寡辨其可任者國中自七尺以  
及六十野自六尺以及六十有五皆征之其舍者國中  
貴者賢者能者服公事者老者疾者皆舍以歲時入其書  
注國中城郭中也晚賦稅而早免之以其所居復多  
役少野早賦稅而晚免之以其復少役多入其書者  
言於大司徒鄭司農云服公事者謂若今吏有復除  
也

疏七尺謂年二十知者案韓詩外傳二十行役六尺謂年十五以六十五對六十晚校五年知六尺與七尺早校五年云皆征之者謂築作挽引道渠之役及出賦若田獵五十則免征伐六十則免是以祭義云五十不為甸徒王制云六十不與服戎二者並不辨國中及野外鄭知國中復多役少者以經云貴者至疾者皆舍總據國中而言也訓征兼田賦及力役國中與野早晚異者國中復多役

少野復少役多受田因從役轉也國中當以四郊  
言

三年則大比攷其德行道藝而興賢者能者鄉老及鄉  
大夫帥其吏與其衆寡以禮禮賓之

注賢者有德行者能者有道藝者變舉言興者謂合  
衆而尊寵之以鄉飲酒之禮禮而賓之

厥明鄉老及鄉大夫羣吏獻賢能之書于王王再拜受  
之登于天府內史貳之

注厥其也其賓之明日也天府掌祖廟之寶藏者內史副寫其書者當詔王爵祿之時

退而以鄉射之禮五物詢衆庶一曰和二曰容三曰主皮四曰和容五曰興舞

疏言退者謂獻賢能之書于王退來鄉內云以鄉射之禮者州長春秋二時習射于序名為鄉射今鄉大夫還用此鄉射之禮詢衆庶也訓家君子曰五物即射中之事和內志正也容外體直也主皮

中也和容其節比于樂也興舞其進退揖讓比于禮也大司樂王大射則詔諸侯以弓矢舞注謂舞者執弓挾矢進退揖讓之儀大司徒以鄉三物教萬民而賓興之然則賓興之賢是升於司徒而為選士者也賢書既登即繼以鄉射之禮以詢衆庶是復擇其賢能而論於鄉所謂秀士者也詢衆庶者於衆庶之中詢其賢能而舉之射以觀德故取焉

此謂使民興賢出使長之使民興能入使治之

注言是乃所謂使民自舉賢者因出之而使之長民  
教以德行道藝於外也使民自舉能者因入之而使  
之治民之貢賦田役之事於內也言為政以順民為  
本也

疏出使長之以賢者德大故遣出外或為都鄙主  
或為諸侯皆可也入使治之以能者德小故還入  
鄉中量德小大以為比長鄰長已上之官治民之

貢賦田役於內也

歲終則令六鄉之吏皆會政致事正歲令羣吏攷灋于司徒以退各憲之於其所治之國大詢于衆庶則各帥其鄉之衆寡而致於朝

訓攷灋于司徒就鄉大夫所受法而攷之也重言之者申明之意經文多有之州長黨正皆然注大詢者詢國危詢國遷詢立君

國有大故則令民各守其閭以待政令



注使民皆聚於閭胥所治處

以旌節輔令則達之

注民雖以徵令行其將之者無節則不得通

疏以旌節輔此徵令文書

州長各掌其州之教治政令之灋正月之吉各屬其州之民而讀灋以攷其德行道藝而勸之以糾其過惡而戒之若以歲時祭祀州社則屬其民而讀灋亦如之春

秋以禮會民而射于州序

屬音燭下同

注序州黨之學也

疏此歲時謂春秋二時春祭社以祈豐熟秋祭社以報功以禮會民亦謂先行鄉飲酒之禮乃射知序州黨學者下黨正亦云飲酒于序若鄉則立庠故鄉飲酒義云主人迎賓于庠門外彼賓興賢能非州黨所行故知是鄉學也

凡州之大祭祀大喪皆蒞其事

注大祭祀謂州社稷也大喪鄉老鄉大夫於是卒者

也

疏云州則非國家祭祀喪事

若國作民而師田行役之事則帥而致之掌其戒令與  
其賞罰

注掌其戒令賞罰則是於軍因為師帥

疏行謂巡帥而致者州長致與小司徒小司徒  
乃帥而致與大司徒也云因為師帥者若衆屬軍  
吏則賞罰戒令別有軍吏掌之矣

歲終則會其州之政令正歲則讀教灋如初

訓如初指上文正月之吉言也此又正月與正歲不容別之一証矣

三年大比則大攷州里以贊鄉大夫廢興

疏言大者時有興廢故也訓此謂考鄉之羣吏

黨正各掌其黨之政令教治及四時之孟月吉日則屬民而讀邦灋以糾戒之

注以四孟之月朔日讀灋者彌親民者於教亦彌數

訓案讀法州三度正月之吉及春秋祭社也黨六度四孟月朔及春秋祭禋也族十四度十二月朔及春秋祭醑也

春秋祭禋亦如之

禋音禋永兵切又音詠

注謂雩禋水旱之神蓋亦為壇位如祭社稷云

疏黨不得祭社故祭禋

國索鬼神而祭祀則以禮屬民而飲酒于序以正齒位一命齒于鄉里再命齒于父族三命而不齒

注國索鬼神而祭祀謂十二月大蜡之時正齒位者鄉飲酒義所謂六十者坐五十者立侍六十者三豆七十者四豆八十者五豆九十者六豆是也黨正飲酒禮亡以此事屬於鄉飲酒之義微失少矣凡射飲酒此鄉民雖為鄉大夫必來觀禮鄉飲酒鄉射記大夫樂作不入士既旅不入是也齒于鄉里者以年與衆賓相次也齒於父族者父族有為賓者以年與之相次異姓雖有老者居于其上不齒者席于尊東所謂

遵

疏正齒位非蜡祭禮但其禮在蜡月耳一命下士  
再命中士三命上士鄭引鄉飲酒鄉射記者証二  
事俱有一命以上觀禮之節又案鄭注鄉飲酒無  
黨正正齒位之事以彼是三年貢士直行飲酒禮  
賢者為賓其次為介其次又為衆賓禮異也又云  
天子之國三命乃不齒諸侯之國爵為大夫則不  
齒蓋公侯伯之大夫再命子男之大夫一命但大

夫爵尊無論命數皆不齒也齒于鄉里在堂下齒于父族在堂上若賓賢能則天子之士再命已下及諸侯之士皆在堂下與鄉人齒別為一禮也

凡其黨之祭祀喪紀昏冠飲酒教其禮事掌其禁戒

冠古

亂反

注其黨之民

疏此並是民之所行與州之大祭大喪異

凡作民而師田行役則以其灋治其政事



注亦於軍因為旅帥

訓郎氏曰法謂十五比聯

歲終則會其黨政帥其吏而致事

疏致於州長

正歲屬民讀灋而書其德行道藝

疏每年正歲皆書記觀勉之三年即貢之也

以歲時涖校比

注鄭司農云校比族師職所謂以時屬民而校登其

族之夫家衆寡辨其老幼貴賤廢疾可任者及其六畜車輦

疏案族師以四時校比黨正臨之

及大比亦如之

疏亦蒞之

族師各掌其族之戒令政事

注政事邦政之事

月吉則屬民而讀邦灋書其孝弟睦婣有學者

注月吉每月朔日

疏有學即六藝

春秋祭酺亦如之

酺音步  
或音蒲

注酺者為人物裁害之神故書酺或為步杜子春云  
當為酺玄謂校人職又有冬祭馬步則未知此世所  
云蟻螟之酺與人鬼之步與蓋亦為壇位如雩禱云  
族長無飲酒之禮因祭酺而與其民以長幼相獻酬  
焉

疏云族長無飲酒禮者案上州長春秋習射黨正  
十月農功畢二事皆有飲酒禮皆得官物為之族  
卑不得官物故須合錢飲酒耳

以邦比之澹帥四閭之吏以時屬民而校登其族之夫  
家衆寡辨其貴賤老幼廢疾可任者及其六畜車輦  
疏車駕牛馬輦人挽行訓六畜車輦亦辨其耗息  
及完弊也

五家為比十家為聯五人為伍十人為聯四閭為族八

間為聯使之相保相受刑罰慶賞相及相共以受邦職

以役國事以相塋埋

葬如字劉才郎反埋本或作狸莫皆反

注相共猶相救相賙

疏張逸問俗百家安得有八閭鄭答并之為聯耳

相保不為愆負相受謂相寄託趙商問族師之義

鄰比相坐康誥之說門內尚寬鄭答族師是周公

新制之法康誥時周法未定新誅三監務在尚寬

故也訓此所謂邦比之法兩兩相聯

若作民而師田行役則合其卒伍簡其兵器以鼓鐸旗物帥而至掌其治令戒禁刑罰

注亦於軍因為卒長

訓鼓鐸旗物自軍將以下各有所當用於族師見之耳

歲終則會政致事

問胥各掌其問之徵令

訓問卑故不言政教之事

以歲時各數其閭之衆寡辨其施舍凡春秋之祭祀役政喪紀之數聚衆庶既比則讀灋書其敬敏任恤者數色

主反政如字杜音征鄭書既為暨杜讀暨為既

注祭祀謂州社黨禋族酺也役田役也政若州射黨飲酒也喪紀大喪之事四者及比皆會聚衆民因以讀法以勅戒之

疏族師以上官尊讀法皆有時節閭胥里但是聚衆庶比之時節讀法耳上師田行役並言則役是

役作此文不言田則役兼田役也訓郎氏曰喪紀  
謂族相葬埋上四者皆聚衆庶以共其事歲時  
則數其衆寡祭喪役政則亦聚衆庶二者皆須比  
既比讀法承二事言

凡事掌其比釁撻罰之事

釁古音充又古橫反說文从角黃聲撻吐達反

注釁撻者失禮之罰也釁用酒其爵以兕角為之撻  
扑也

疏言凡事非一則是鄉飲酒及鄉射飲酒失禮須



罰者詩曰兕觥其觶知爵用兕角也

比長各掌其比之治五家相受相和親有臯奇衰則相

及

臯本亦作罪  
衰似嗟反

注衰猶惡也

徙于國中及郊則從而授之

注徙謂不便其居也或國中之民出徙郊或郊民入

徙國中皆從而付所處之吏明無罪惡

疏古者三歲大比之年民有不便本居則任其遷

徙此國中及郊所徙者並不離當鄉之內伍長自往付授

若徙于他則為之旌節而行之

注徙於他謂出居異鄉也授之者有節乃達

疏上是伍長送授彼吏此非直授魚亦有節

若無授無節則唯圜土內之

注鄉中無授出鄉無節過所則呵問繫之圜土考辯之也

疏辟法也考辟考量以法

封人掌設王之社壝為畿封而樹之

注畿上有封若今時界矣不言稷者稷社之細也

疏為畿封而樹之者謂王國外四面五百里各置  
畿限畿上皆為溝塹其土在外為封又樹木而為  
阻固

凡封國設其社稷之壝封其四疆

疏案禹貢徐州貢五色土孔注云王者封五色土

為社建諸侯則各割其方色土與之使立社燾以黃土苴以白茅茅取潔黃取王者覆四方

造都邑之封域者亦如之令社稷之職

注將祭之時令諸有職事於社稷者郊特牲曰唯為社事單出里唯為社田國人畢作唯為社丘乘供粢盛訓唯為社事單出里若在六鄉則助祭於州若在采地則助祭於都鄙此則據六鄉言單出里者家出一人國人畢作者無得住家丘乘共粢盛者天

子諸侯有藉田則祭祀粢盛是藉田共大夫以下  
無藉田則丘乘之民以所助耕之公田供也

凡祭祀飾其牛牲設其楅衡置其絳共其水橐

楅音楮  
絳本又

作絳持忍反玉篇

同絳橐古老反

注飾謂刷治潔清之也楅設于角衡設于鼻水橐給  
殺時洗薦牲也絳字當以多為聲 鄭司農云絳著  
牛鼻繩

疏水以洗牲橐以薦牲

歌舞牲及毛炮之豚

炮薄交反

注君牽牲入時隨歌舞之言其肥香以歆神也毛炮

豚者燂去其毛而炮之以備八珍

凡喪紀賓客軍旅大盟則飾其牛牲

注大盟會同之盟

鼓人掌教六鼓四金之音聲以節聲樂以和軍旅以正

田役

注音聲五聲合和者

疏案眡瞭職云掌播鼗下又云鼙愷獻亦如之雖  
不云擊鼓參之上下文五鼓是眡瞭擊之晉鼓是  
鐸師擊之故其職云掌金奏之鼓此下文云以晉  
鼓金奏鼓鼓人所教當教眡瞭鐸師節聲樂者雷鼓  
靈鼓路鼓晉鼓皆是也和軍旅者鼗鼓正田役者  
鼙鼓田獵所以習戰當與軍事同鼓

教為鼓而辨其聲用

注教為鼓教擊鼓者大小之數又別其聲所用之事

訓鼓擊也

以雷鼓鼓神祀

注雷鼓八面鼓也神祀祀天神也

疏案大司樂以靈鼓祭方丘此下文靈鼓鼓社祭  
則但是地示無問大小皆用靈鼓但是天神皆用  
雷鼓矣鄭知雷鼓八面者案韞人有晉鼓鼗鼓皋  
鼓三者非祭祀之鼓皆兩面則路鼓祭宗廟宜四  
面靈鼓六面雷鼓八面差次知然也



以靈鼓鼓社祭

注靈鼓六面鼓也社祭祭地示也

疏此舉社以表地示也

以路鼓鼓鬼享

注路鼓四面鼓也鬼享享宗廟也

疏享先王大祀先公次祀祭殤小祀同用路鼓也

以鼗鼓鼓軍事

鼗扶云反

注大鼓謂之鼗鼗鼓長八尺

疏案大司馬諸侯執鼗鼓

以鼗鼓鼓役事

鼗音焦

注鼗鼓長丈二尺

疏起役止役皆用鼗鼓

以晉鼓鼓金奏

注晉鼓長六尺六寸金奏謂樂作擊編鐘

疏凡作樂先擊鐘次即擊鼓金即鐘也奏即擊也

鐘師云以鐘鼓奏九夏鄭云擊編鐘者鐘有不編

不編者鍾師擊之編鐘磬師擊之皆是金秦鄭惟  
言編鐘實則不編者晉鼓皆和之

以金鐃和鼓

鐃音淳

注鐃鐃于也圜如碓頭大上小下樂作鳴之與鼓相和  
疏云樂作鳴之與鼓相和者案下三金見大司馬  
在軍所用金鐃不見軍用明作樂時和鼓也

以金鐃節鼓

鐃音疾陟玉切又音蜀

注鐃鉦也形如小鐘軍行鳴之以為鼓節司馬職曰

軍行鳴鐃

以金鐃止鼓

鐃音如  
交切

注鐃如鈴無舌有秉執而鳴之以止擊鼓司馬職曰

鳴鐃且卻

疏進軍擊鼓退軍鳴鐃

以金鐸通鼓

注鐸大鈴也振之以通鼓司馬職曰司馬振鐸

疏此是金鈴金舌在軍所振金鈴木舌者為木鐸

施令時所振

凡祭祀百物之神鼓兵舞帔舞者

帔音佛  
劉音弗

注兵謂干戚也帔列五采繒為之有秉皆舞者所執

疏上言神祀社祭鬼享此更廣見小神下舞師山

川用兵舞社稷用帔舞今小神近山川者舞兵舞

近社稷者舞帔舞也訓家君子曰百物之神蓋民

間所祭其蜡祭之類耶

凡軍旅夜鼓鑿

鑿音戚  
倉歷切

注鑿夜戒守鼓也司馬灋曰昏鼓四通為大鑿夜半三通為晨戒旦明五通為發昃

軍動則鼓其衆

注動旦行

疏曹劌云一鼓作氣則此是據將臨陣時

田役亦如之

訓亦夜鼓鼓衆也

救日月則詔王鼓

注救日月食王必親擊鼓者聲大異

疏祭日月與天神同用雷鼓則救日月亦用雷鼓  
太僕與戎右云贊王鼓者雷鼓八面彼得佐擊餘  
面也

大喪則詔大僕鼓

注始崩及窆時也

疏大僕職始崩戒鼓窆亦如之

舞師掌教兵舞帥而舞山川之祭祀教帔舞帥而舞社

稷之祭祀教羽舞帥而舞四方之祭祀教皇舞帥而舞

早曠之事

曠音漢  
呼旦反

注羽析白羽為之形如帟也四方之祭祀謂四望也  
早曠之事謂雩也皇析五采羽為之亦如帟

疏此謂教野人使知之案春官樂師有六舞此無  
旄舞人舞二者蓋旄舞施于辟雍人舞施於宗廟  
俱不得用卑者之子彼樂師教國子故有之此教  
野人故無二舞也訓四方蓋即大宗伯所謂四方



百物大蜡之祭也

凡野舞則皆教之

注野舞謂野人欲學舞者

疏案序官舞徒四十人其數有限今云皆教之者  
以待其闕

凡小祭祀則不興舞

注小祭祀王玄冕所祭

疏案司服羣小祀注云林澤墳衍四方百物之屬

如是則亦應有兵舞帔舞而云不興舞者雖同小  
祀若外神林澤等亦有舞若宮中七祀則無舞也  
訓若宗廟祭殤亦是小祭祀 家君子曰鼓人隸  
於司徒者司徒掌徒役凡師田行役鼓用為多舞  
師不隸於宗伯者此四祀當是民間之祭與樂師  
所掌不同社稷即上州社山川四方蓋亦各於其  
地早暵恐亦民自祈禱若天子大雩帝用盛樂豈  
特皇舞而已也

牧人掌牧六牲而阜蕃其物以共祭祀之牲牷

蕃音煩  
牷音全

注牷體完具

疏五官各有牛人羊人犬人豕人之等擇取純毛者以供牧人牧人又供與克人芻之三月以祭祀養之曰畜將用曰牲

凡陽祀用騂牲毛之陰祀用黝牲毛之望祀各以其方

之色牲毛之

黝於糾反  
司農音幽

注騂牲赤色毛之取純毛也陽祀祭天於南郊及宗

廟陰祀祭地北郊及社稷望祀五嶽四鎮四瀆也鄭  
司農云黝讀為幽幽黑也

疏案大宗伯蒼璧禮天黃琮禮地牲幣各放其器  
之色謂圜丘方澤四時迎五方帝各依方色此騂  
牲黝牲唯有祭天南郊及宗廟祭地北郊及社稷  
也訓祭天南郊祭地北郊說見宗伯職首

凡時祀之牲必用牲物

注時祀四時所常祀謂山川至四方百物

疏鄭惟據地之時祀實則天神日月以下亦在時  
祀中也訓不言色者蓋凡天神人鬼之屬皆用騂  
凡地示之屬皆用黝也上見毛色之純此見牲體  
之全互言之耳

凡外祭毀事用尨可也

尨亡  
江反

注外祭謂表貉及王行所過山川用事者杜子春云  
尨雜色不純毀謂副辜侯禳毀除殃咎之屬

疏案校人職將事于四海山川則飾黃駒亦是外

祭蓋據龙中有黃色者用之不必純黃鄭注宗伯  
副辜引九門磔禳小祝職有將事候禳皆毀除殃  
咎非是常祭訓此節對上時祀則此是不以時而  
有事者注引副辜之文宗伯以副辜祭四方百物  
則是時祀也蓋此惟據九門磔禳亦用副辜為毀  
除之祭其四方百物用副辜則在時祀中也既用  
龙則亦或不盡牲物而用之矣

凡祭祀共其犧牲以授充人繫之

注犧牲毛羽完具者授充人者當殊養之

疏犧純色

凡牲不繫者共奉之

注謂非時而祭祀者

疏外祭毀事是非時祭祀訓天地宗廟之牲則繫於牢芻之三月餘散祭祀則繫于門不必三月非時祭祀則并不繫

牛人掌養國之公牛以待國之政令

注公猶官也

凡祭祀共其享牛求牛以授職人而芻之

注享牛謂所以祭者也求牛謂所以繹者也宗廟有繹者孝子求神非一處職讀為檝檝謂之杙可以繫牛檝人者謂牧人充人與芻牲之芻牛人擇於公牛之中而以授養之

凡賓客之事共其牢禮積膳之牛

積子  
賜反

注牢禮殮饗也積所以給賓客之用若司儀職曰主



國五積者也膳所以間禮賓客若掌客云殷膳太牢

饗食賓射共其膳羞之牛

食音嗣  
下文同

注燕禮小臣請執冪者與羞膳者至獻賓而膳宰設折俎王之膳羞亦猶此

疏饗食皆烹太牢天子諸侯射則先行燕禮皆有殺俎故有牛也膳羞則庶羞不言正俎之牛者可以相兼矣

軍事共其犒牛喪事共其奠牛

犒音餽  
苦到切

注謂殷奠遣奠也

疏喪自未葬已前無尸故謂之奠朝夕奠無尊卑  
皆脯醢酒而已無牲體殷奠謂小斂大斂朔月月  
半薦新祖奠及遣奠時則有牲體遣奠非直牛亦  
有馬牲

凡會同軍旅行役共其兵車之牛與其牽徭以載公任

器

徭音徭  
薄浪反

注牽徭在轅外挽牛也人御之居前曰牽居旁曰徭

疏會同軍旅，兼言行役，謂王巡狩，六軍從也。兵車之牛者，兵車駕四馬之外，別有兩轅，駕牛以載任器者，亦謂之兵車。兵車之牛，據在轅內，牽傍在轅外，在前曰牽，在旁曰傍。

凡祭祀共其牛牲之互，與其盆簠以待事。

互劉音護，徐音牙，簠音奈。

劉魯討反

注鄭司農云：盆所以盛血，簠受肉籠也。玄謂互若令

屠家縣肉格。

疏互當是始殺解體未薦之時且縣于互解訖乃薦之

充人掌繫祭祀之牲牷祀五帝則繫于牢芻之三月

注牢閑也養牛羊曰芻三月一時節氣成

疏云祀五帝者實昊天與地示四望社稷凡外神皆繫之訓細案經文繫于牢芻之三月者唯大祀為然次祀小祀恐當入下文散祭祀中

享先王亦如之凡散祭祀之牲繫于國門使養之

散素旦反

注散祭祀謂司中司命山川之屬鄭司農云使養之  
使守門者養之

疏案楚昭王問於觀射父曰芻豢牲則不必三月  
其諸侯祭祀養牲幾何對曰遠不過三月近不過  
浹日孔注云遠牛羊豕近犬雞之屬然則此散祭  
祀不言三月亦可浹日而已

展牲則告牷

注展牲若今夕牲也特牲饋食之禮曰宗人視牲告

充舉獸尾告備近之

疏夕牲漢法又引特牲禮亦謂祭前之夕

碩牲則贊

注贊助也君牽牲入將致之助持之也春秋傳曰奉牲以告曰博碩肥腍

疏上據夕牲此據正祭

載師掌任土之灋以物地事授地職而待其政令

注任土者任其力勢所能生育且以制貢賦也物物

色之以知其所宜之事而授農牧衡虞使職之

訓任土者任以生物任以作賦物地事授地職任以生物也待其政令任以作賦也廛里場圃以下所謂物地事授地職也國宅無征以下所謂待其政令也

以廛里任國中之地以場圃任園地以宅田士田賈田任近郊之地以官田牛田賞田牧田任遠郊之地以公邑之田任甸地以家邑之田任稍地以小都之田任縣

地以大都之田任墾地

塵直連反場直良反賈音古墾音薑居良反

注鄭司農云墾市中空地未有肆城中空地未有宅者民宅曰宅宅田者以備益多也士田者士大夫之子得而耕之田也賈田者吏為縣官賣財與之田官田者公家之所耕田牛田者以養公家之牛賞田者賞賜之田牧田者牧六畜之田司馬法曰王國百里為郊二百里為州三百里為野四百里為縣五百里為都杜子春云五十里為近郊百里為遠郊玄謂墾



民居之區域也里居也圃樹果蓏之屬季秋於中為  
場樊圃謂之園宅田致仕者之家所受田士相見禮  
曰宅者在邦則曰市井之臣在野則曰草茅之臣士  
讀為仕仕者亦受田所謂圭田也孟子曰鄉以下必  
有圭田圭田五十畝賈田在市賈人其家所受田也  
官田庶人在官者其家所受田也牛田牧田畜牧者  
之家所受田也公邑謂六遂餘地天子使大夫治之  
自此以外皆然二百里三百里其上大夫如州長四

百里五百里其下大夫如縣正是以或謂二百里為  
州四百里為縣云遂人亦監焉家邑大夫之采地小  
都卿之采地大都公之采地王子弟所食邑也置五  
百里王畿界也凡王畿方千里積百同九百萬夫之  
地也有山陵林麓川澤溝瀆城郭宮室涂巷三分去  
一餘六百萬夫又以田不易一易再易上中下相通  
定受田者三百萬家也遠郊之內地居四同三十六  
萬夫之地也三分去一其餘二十四萬夫六鄉之民

七萬五千家通不易一易再易一家受二夫則十五萬夫之地其餘九萬夫廩里也場圃也宅田也士田也賈田也官田也牛田也賞田也牧田也九者亦通受一夫焉則半農人也定受田十二萬家也食貨志云農民戶一人已受田其家衆男為餘夫亦以口受田如此士工商家受田五口乃當農夫一人今餘夫在遂地之中如此則士工商以事人在官而餘夫以力出耕公邑甸稍縣都合居九十六同八百六十四

萬夫之地城郭宮室差少涂巷又狹於三分所去六  
而存一焉以十八分之十三率之則其餘六百二十四  
萬夫之地通上中下六家而受十三夫定受田二百  
八十八萬家也其在甸七萬五千家為六遂餘則公  
邑

疏司農以士田為士大夫之子耕田案禮記問士  
之子長曰能耕是士子不免農若大夫以上之子  
則免農禮運曰大夫有田以處其子孫故後鄭不

從賞田即夏官司勲賞田是也圃謂田首之界家有二畝半以為井竈葱韭王制圭田無征此士田在近郊十一而稅者彼是殷法云遂人亦監焉者案遂人云掌野鄭云郊外野大總言之則自百里外至五百里皆曰野蓋鄉遂及公邑皆為溝洫法是以遂人亦監焉云王子弟所食邑者王庶子及母弟與公同食百里地在疆稍疏者與卿同食五十里地在縣又疏者與大夫同食二十五里地

在稍引食貨志農民餘夫以口受田者案遂人云夫一廛田百畝餘夫亦如之農家以七夫為計餘子弟多三十有室受地與正夫同故何休云一夫一婦受田百畝案孟子云餘夫二十五畝者彼是年二十九以下未有妻者受口田二十五畝也云士工商家受田五口乃當農夫一人者此則上云半農人者是也士有祿沾及子弟工商賤故五口乃當農夫一人云餘夫以力出耕公邑者還是五

口之內有丈夫者也案張逸問十八分之十三率  
之何謂鄭云遂人上地有菜五十畝相通三夫受  
六百五十畝地於三分所去六而存一訓問士人  
受田如何朱子曰上士中士下士是有命之士已  
有祿如管子士鄉十五是未命之士故亦受田近  
郊遠郊皆士工商之家除農民不算在七家中蓋  
農民自遠郊近郊甸稍縣都皆有莫適舉也牛田  
牧田或即是養蕃六畜之處九職所謂藪牧者也

凡任地國宅無征園廛二十而一近郊十一遠郊二十而三甸稍縣都皆無過十二唯其漆林之征二十而五注征税也國宅凡官所有宮室吏所治者也國稅輕近而重遠近者多役也園廛亦輕之者廛無穀園少利也古之宅必樹而壘場有瓜

蔬稍縣都有三等采地為井田助法此云十二者除三等采地而言注云廛無穀園少利者廛則五畝之宅在國中園則百畝田畔家各二畝半異義



案公羊十一稅無遠近之差漢制收租有上中下  
與周禮同義玄之聞也周禮授民田家所養者多  
與之美田所養者少與之薄田漢無授田法富者  
貴美且多貧者賤薄且少與周禮異周禮稅法據  
王畿公羊稅法據侯國侯國無遠近之差者以其  
國小地狹役賦事暇也訓朱子曰近郊十一遠郊  
二十而三甸稍縣都皆無過十二此即是田稅蓋  
近處如六鄉家家為兵其役多故稅輕遠處如都

鄙井田法七家而賦一兵其役少故稅重所謂十  
二者是并雜稅言也

凡宅不毛者有里布凡田不耕者出屋粟凡民無職事  
者出夫家之征

注鄭司農云宅不毛者謂不樹桑麻也布泉也宅不  
毛者有里布民無職事出夫家之征欲令宅樹桑麻  
民就四業則無稅賦以勸之也玄謂宅不毛者罰以  
一里二十五家之泉空田者罰以三家之稅粟以供

吉凶二服及喪器也民雖有閒無職事者猶出夫稅  
家稅也夫稅者百畝之稅家稅者出土徒車輦給繇  
役

疏里布謂二十五家之口泉漢法人百二十夫三  
為屋田不耕者罰以三夫之稅粟民無職事此則  
太宰閒民無常職轉移執事之人訓家君子曰里  
布乃布帛之布蓋不毛則出布不耕則出粟無職  
則出征征者力役之政蓋各以其類 二十五家

之布二十五家嬪婦之所出也

以時徵其賦

疏閭師徵斂六鄉之賦貢遂師旅師斂六遂以外  
之賦貢載師掌畿內地事亦徵其賦案閭師注賦  
謂九賦九貢則此賦貢含有也至於里布屋粟及  
閒民夫家之征亦可徵之

閭師掌國中及四郊之人民六畜之數以任其力以待  
其政令以時徵其賦

注國中及四郊是所主數六鄉之中自廛里至遠郊也賦謂九賦及九貢

疏閭師徵斂百里內之賦貢云賦謂九賦及九貢者案太宰賦有九等此徵國中四郊唯有二賦言九者大總而言九貢九職之貢即下文貢九穀之等是也訓家君子曰閭師所掌貢即九功之貢也蓋自中國及四郊六鄉之地閭師所貢其餘則食采之君貢之與

凡任民任農以耕事貢九穀任圃以樹事貢草木任工以飭材事貢器物任商以市事貢貨賄任牧以畜事貢鳥獸任嬪以女事貢布帛任衡以山事貢其物任虞以澤事貢其物

注貢草木謂葵韭果蓏之屬

疏冢宰九職此分山澤為二唯有八者臣妾無稅閒民則載師已見出夫家之征故不言

凡無職者出夫布

注獨言無職者掌其九賦

疏此無職即太宰閒民出夫布者出一夫口泉訓  
無職者既給力役亦出夫布

凡庶民不畜者祭無牲不耕者祭無盛不樹者無椁不  
蠶者不帛不績者不衰

注掌罰其家事也

疏祭無牲死後祭之無牲也無椁死後無椁不衰  
者死則不為著衰訓朱子云載師凡民無職事者

出夫家之征閭師凡無職者出夫布前重後輕者  
載師所掌以待士大夫之有土者閭師所掌方是  
待庶民宅不毛為其為亭臺也田不耕為其為池  
沼也民無職事此是大夫家所養浮泛之人也

縣師掌邦國都鄙稍甸郊里之地域而辨其夫家人民  
田萊之數及其六畜車輦之稽三年大比則以攷羣吏  
而以詔廢置

注郊里郊所居也自邦國以及四郊之內是所主數



周天下也萊休不耕者

疏邦國據畿外諸侯都鄙據大都小都稍據家邑  
甸據六遂郊里據遠郊至國中紫遺人云鄉里又  
云郊里彼鄉里據國中郊里據在郊

若將有軍旅會同田役之戒則受灋于司馬以作其衆  
庶及馬牛車輦會其車人之卒伍使皆備旗鼓兵器以  
帥而至

注受灋于司馬者知所當徵衆寡

疏車人之卒伍者人則百人為卒伍人為伍車亦有卒伍案鄉師云以旗致萬民此云而至謂帥而至鄉師也

凡造都邑量其地辨其物而制其域

量音良


注物謂地所有也名山大澤不以封

疏都謂大都小都邑謂家邑域即疆域大小

以歲時徵野之賦貢

注野謂甸稍縣都

疏郊內賦貢閭師徵斂郊外賦貢縣師徵之遂師  
旅師斂之訓載師掌畿內財賦之政縣師兼掌畿  
內師役之令



周禮纂訓卷六